

**Uunga siunnersuut: Nunanit allanit aningaasanik taarsigassarsinissaq pillugu
Inatsisartut inatsisaata atorunnaarsinneqarnissaanik Inatsisartut inatsisaat nr. xx, xx.
xxx 2017-imeersoq**

(Aningaasaqarnermut Akileraartarnermullu Naalakkersuisoq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq
Inatsisartunut ilaasortaq Randi V. Evaldsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Bendt Kristiansen, Inuit Ataqatigiit
Inatsisartunut ilaasortaq Martha Lund Olsen, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Kelly Berthelsen, Inuit Ataqatigiit

Ulloq 21. april 2017-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inatsisartut inatsisaat ullumikkut tulluarunnaarsimasoq siunnersuuteqartup oqaatigaa, tassungalu ilanngullugu oqaatigalugu Naalakkersuisut Inatsisartunut imaluunniit Aningaasaqarnermut Akileraartarnermullu Ataatsimiititaliamut suliamik siumoortumik saqqummiusseqqaarnatik annertunerusunik taarsigassarsisinnaanerata sulianik pitsaasumik ingerlatsinissamut akerliursorinartoq.

2. Siunnersuutip Inatsisartunit siullermeerneqarnera

Siunnersuut siullermeerneqarami akuersaarneqarluarpoq nalinginnaasumillu taparserneqarluni. Taarsigassarsiniartarnermi maleruagassat periusissallu Namminersorlutik Oqartussat taarsigassarsiniartarnerisa pitsaanerpaamik ingerlanneqartarnissaannik qulakkeerinnissinnaasut siunnersuutip siullermeerneqarnerani ujartorneqarput.

3. Ataatsimiititaliap siunnersuummik suliarinninnera

Taarsigassarsinissamik Namminersorlutik oqartussat kissaataat sulluunniit tamanna sioqqullugu Inatsisartunut imaluunniit Aningaasaqarnermut Akileraartarnermullu Ataatsimiititaliamut saqqummiunneqartarnissaat siunnersuutikkut matumuunakkut ersersinneqarmat iluarsisimaaramiuk Aningaasaqarnermut Akileraartarnermullu Ataatsimiititaliap oqaatigissavaa.

Taarsigassarsiniartarnermi maleruagassat periusissallu Namminersorlutik Oqartussat taarsigassarsiniartarnerisa pitsaanerpaamik ingerlanneqartarnissaannik qulakkeerinnissinnaasut siunnersuutip siullermeerneqarnerani ujartorneqartut Aningaasaqarnermut Akileraartarnermullu Ataatsimiititaliamit maluginiarneqarpoq. Aningaasanut inatsimmi siunertamut kontomut 20.10-mut, suliniutinut immikkut siunertalinnut tunngasumut, oqaasertaliussaq naapertorlugu Naalakkersuisut taarsigassarsinnaaneq pillugu maleruagassanik erseqqinnerusunik aalajangersaasinnaapput. Taamatuttaaq Kommunit Namminersorlutillu Oqartussat missinger-suutaat naatsorsuutaallu pillugit Inatsisartut inatsisaat nr. 26, 28. november 2016-imeersoq naapertorlugu Naalakkersuisut taarsigassarsinissaq aammalu taarsigassarsinissamut akuersinissaq il.il. pillugit maleruagassanik erseqqinnerusunik aalajangersaasinnaapput. Pitsaanerpaamik atugassaqartitsilluni Namminersorlutik Oqartussat taarsigassarsinissaat qulakkeerniarlugu piginnaatitsissutit siuliani taaneqartut qanoq atorneqarnerat pillugu Naalakkersuisut nassuiaateqarnissaat siunnersuummik suliarinninnerminut atatillugu ataatsimiititaliap kissaatigaa. Naalakkersuisut akissutaat isumaliutissiissummut ilanngussatut ilanngunneqarpoq.


4. Siunnersuutip aningaasaqarnikkut kingunerisassai

Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut Aningaasaqarnermut Akileraartarnermullu Ataatsimiititaliap oqaaseqaatissaqanngilaq.

5. Ataatsimiititaliap inassuteqaatai

Tamanna tunngavigalugu siunnersuut akuerineqassasoq **ataatsimiititaliap isumaqatigiittup** inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Jens Immanuelson,
siulittaasoq



Randi V. Evaldsen



Peter Olsen



Bendt B. Kristiansen



Martha Lund Olsen



Ineqi Kielsen



Kelly Berthelsen



BILAG

Inatsisartut Aningaasaqarnermtu Akileraartarnermullu Ataatsimiititaliaat

UANI

UPA 2017/19 – Taarsigassarsisarnerit pillugit malittarisassat suleriaatsillu pillugit apeqqutit

Brevdato: 03-05-2017
Sags nr. 2017 - 3956
Akt id. 5274070

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

Aningaasaqarnermut Akileraartarnermullu Ataatsimiititaliaap 2. maj 2017-imi allakkatigut kissaatigaa, Naalakkersuisut Namminersorlutik Oqartussat taarsigassarsiniartarneranni piumasaqaataasut pitsaanerpaat qanoq ilillutik qulakkeersimaneraat pillugu nassuiaassasut. Matumuuna ataatsimiititaliaq aningaasanut inatsimmi siunertamut kontomut 20.10, Suliniutit immikkut siunertallit, oqaasertaliussanut innersuussivoq, oqaasertaliussaq naapertorlugu Naalakkersuisut taarsigassarsisinnaaneq pillugu maleruagassanik sukumiinerusumik aalajangersaasinnaapput, kiisalu Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaat nr. 26, 28. november 2016-imeersoq naapertorlugu Naalakkersuisut taarsigassarsinissamut aamma taarsigassarsisinnaanissamut akuersinissamut il.il. maleruagassanik sukumiinerusumik aalajangersaasinnaapput.

Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaat nr. 26, 28. november 2016-imeersumi immikkoortut pingaarnerit 1. januar 2018-imi atuutilissapput. Inatsisip atuutilernerani eqqunneqarnerani nalunaarutit tapersiissutaasussat il.il. maannakkut ilusilersorneqarneri suliarineqarput. Sulinermi aamma ilaapput taarsigassarsinissamut taarsigassarsisinnaanissamullu akuersinissamut atatillugu maleruagassat sukumiinerusut aalajangersarneqartariaqartut. Sulineq suli ima siuarsimatiginngilaq, avataani illuatungerisamut eqqartueqateqarnissamut missingiummik peqarluta.

Aningaasanut inatsimmi siunertamut kontomut 20.10, Suliniutit immikkut siunertallit, oqaasertaliussat naapertorlugit ilaatigut Namminersorlutik Oqartussat akiliisinnaassusiannik taarsigassarsianillu allannortitsinissaannut kiisalu Inatsisartut Aningaasaqarnermut Akileraartarnermullu Ataatsimiititaliaat ingerlaavartumik ilisimatitsissuteqarfigisarlugu, Namminersorlutik Oqartussani akiliisinnaassuseqarnerup nikerarnera il.il. pakkersimaarniarlugit taarsigassarsiniarnissamut Naalakkersuisut piginnaatinneqarput. Tassunga atatillugu aningaasatigut matuma ataani erniatigut allamiullu aningaasaasigut isumaqatigissuteqarnissamut Naalakkersuisut piginnaatinneqarput.

Namminersorlutik Oqartussat akiliisinnaassusiata pitsaasup malitsigisaanik piginnaatitsissutip atorneqarnissaa suli pisariaqarsimangilaq. Taamaattoqaraluartoq aalajangersakkap ukiuni siuliinit ingerlatiinnarneqartarneranut pissutaavoq, pisoqarsinnaammat Naalakkersuisut iliuuseqapallattariaqarnissaminut pisariaqartitsiffiginnaasaannik. Assersuutitut pisinnaasoq taaneqarsinnaavoq, Namminersorlutik Oqartussat killilersugaanngitsumik akiliisinnaassuseqarnera aningaasartuutinut nalinginnaasunut naammattoq, kisiannili aningaasartuutinut annertuunut naammannani, assersuutigalugu suliffeqarfimmuut Namminersorlutik

Oqartussanit pigineqartumut assigisaanulluunniit pisariaqartitsisumut immikkut ittumik aningaasaliinerit, aningaasaliinissamut taama ittumut tunngaveqareersumut.

Malittarisassat taakku marluk taarsigassarsinissamut tunngavittut atorneqarsimanngimmata, misilittagarineqanngilaq, taamaattoqarnerani taarsigassarsinissamut piumasaqaatit pitsaanerpaat Namminersorlutik Oqartussat qanoq angusinnaaneraat.

Nalunaarutigineqarsinnaavoq, Namminersorlutik Oqartussat akiitsui maannakkut 525 mio. kr.-it missaanniimmata. 2010-mi 2012-imilu Sisimiuni Ilulissanilu erngup nukinganik nukissiorfiliornissat siunertaralugit akiitsut akiitsorneqarput. Akiitsunnginnermi, taarsigassarsititsisut (Nordisk Investeringsbank) peqatigalugu taarsigassarsinissamut piumasaqaatit pillugit arlaleriarluni isumaqatiginninniartoqarpoq. Tamatuma saniatigut piffissami qaninnerusumi taarsigassarsisoqarnikuunngilaq.

Siunertamut kontomut 20.10, Suliniutit immikkut siunertallit, oqaasertaliussani aamma Naalakkersuisut piginnaatinnearput piginneqataassutit aqunneqarnerannut ilisimasanik tunngavilinnik isumaqatigiissuteqartarnissamut.

Oqaasertaliussaq tunngavigalugu Namminersorlutik Oqartussat obligationiinik aqutsinissamut GrønlandsBanken aamma Bank Nordik isumaqatigiissuteqarfigineqarnikuupput. Bank Nordik-ip obligationit 200 mio. kr.-it missaanni nalillit aquppai kiisalu GrønlandsBanken-ip obligationit 600 mio. kr.-it missaanni nalillit aqullugit.

Pappilissat nalillit pillugit malittarisassanik ersarissunik aalajangersagaqarpoq. Isumaqatigiissuteqarnikkut taamaallaat aningaaseriviit taakku marluk obligationinut qularnaatsunut aningaasaliisinnaapput. Tamatuma saniatigut erniat atugassaritallu pillugit ukiumoortumik isumaqatiginninniaqqilluni ataatsimiittoqartarpoq. Kiisalu aningaaseriviit taakku marluk isumaqatigiissuteqarfigineqarnikuupput, Namminersorlutik Oqartussat obligationii aningaaseriviup ammaffigisaani marlunni aningaasanngorlugit taarserneqarsinnaasut, tamanna pisinnaavoq akiliisinnaassutsimik annertunerusumik piaartumik pisariaqartitsisoqarpat.

Inussiarnersumik inuulluaqqusillunga

Med venlig hilsen

Aqqaluaq B. Egede